

四庫全書

集部

欽定四庫全書

古今詩刪卷二十四

明 李攀龍 編

明七言古詩

為祝彥中題山水圖

劉基

高軒玲瓏不受暑半幅輕綃宿烟雨白晝素壁生空明
似聞水聲繞庭宇松髯拂天藤蔓垂枯根瘦石相因依
寒濤不驚虎兕卧嵐翠欲與蛟虬飛空江悠悠一漁艇

渚白沙明萬魚靜武陵桃花何處尋落日微風片帆影

蜀國絃
劉基

胡笳拍斷玄冰結湘靈曲終斑竹裂為君更奏蜀國絃
一彈一聲飛上天蜀國周遭五千里峨眉宮宮連玉壘
岷嶓出水作大江地拍天浮界南紀舒為五色朝霞暉
慘為虎豹嗥陰霏翕為千嶂雲雨入噓為百里雷霆飛
白鹽雪消春水滿谷鳥相呼錦城暖巴姬倚歌漢女和
楊柳壓橋花纂纂銅梁翠氣通青蛉碧雞啼落天上星

山鬼號風寡鵠泣杜鵑鳴咽愁幽冥商悲羽怒聽未了
窮猿三聲巫峽曉瞿塘噴浪翻九淵倒瀉流泉喧木杪
樓頭仲宣羈旅客故鄉渺渺音塵隔含悽更聽蜀國音
不待天明頭盡白

漁樵

劉基

樵問漁江湖風浪惡寧似採薪人無憂如藜藿漁答樵
山中何所有未若櫂扁舟得魚即沽酒

寶劍歌

孫炎

銅劍光耿耿佩之可以當一龍只是陰山太古雪為誰
結此青芙蓉明珠為飾錦為帶三尺枯蛟出冰海自從
虎革裹干戈飛入芒碭毓光彩青田劉郎漢諸孫傳家
惟有此物存匣中千年睡不醒白帝血染桃花痕山童
神全眼如日時見蜿蜒走虛室我逢龍精不敢彈正氣
直貫青天寒還君持之獻明主若歲大旱為霖雨

短歌行

王儼

東風吹花墮錦筵綠楊搖蕩青樓烟主人自為鴈鵲舞

小伎更奏鴛鴦絃當杯入手君不醉落日已在西山顛
短歌一曲心茫然請看明鏡高臺上何須白髮悲芳年

古劍行贈周辰

王偁

憶昔干將初鑄日五夜龍池飛霹靂秋水芒寒鷺鷥膏
虹光鍰吐蓮花質當年曾聞易水歌荊卿不濟當如何
從來相隨赤帝子颯颯秋郊泣嫠鬼乃知神物用有時
風雲變化誰能知祇今蕭條潭水上白日往往蛟龍飛
俠客相看魂欲死一片雄心許知己別來夜夜匣裏鳴

憶君清淚如鉛水為君摩挲試相看劍歌有曲君莫彈
從來烈士皆如此茫茫萬古悲風寒

題楊諭德所藏王孟端瀟湘萬竹圖

曾啓

王郎畫竹何神奇落筆便覺清風吹蛟龍怒爾雷雨泣
滄溟倒捲雲淋漓有時氣酣索紙筆兔起鶻落誰能測
縱橫滿眼金錯刀四座陰森冰雪色九疑峯高青入天
洞庭水與三江連霓旌翠羽半明滅至今遙拂蒼梧烟
玉堂之居迥蕭爽誰與此君同一賞關西美人襟抱清

對此脩然絕塵想我亦平生愛竹流乘興欲作瀟湘遊
何時泛舟弄明月推蓬却聽江南秋

寄張侍御

李夢陽

嚶其鳴矣彼何求天下願識韓荆州心傾義投神便往
萬古不廢江河流張侯崛起西南裔覽輝振翮風雲際
鉤陳蒼涼閭闔閉排闥直謁蓬萊帝挺身遂作蘭臺賓
誓與朱檻爭嶙峋已看騷襲狹道路復訝鵬鶚卑風塵
霜飛維揚海氣苦陽行沮洳汾花春還朝袞衣換日月

立仗正色映星辰行步既工馬從瘦諫草每就雞將晨
予也綸竿孟諸客心本無他衆莫白雷劍雖埋光在天
卞玉未剖終爲石垂老重逢萬國清且自射獵芒碭澤

楊花篇

李夢陽

洛陽三月春風起楊花飛入千門裏只見朝縈上苑烟
那知夕逐東流水苑烟流水無休歇暖日輕盈度仙闕
趙女瑤臺貯綵霞班姬團扇啼明月綵霞明月幾沉輝
陌上行人亂撲衣征夫柳塞愁看鴈少婦香閨懶上機

柳塞香閨萬餘里草色連天度隴水玉門關外雪猶飛
章臺樹裏風先起誰家浪子千金馬平明挾彈章臺下
頭上羅巾玳瑁簪腰間寶鉞珊瑚把踏絮來尋買酒家
持香坐調當壚者當壚美人怨陽春笑掇揚花襯繡裯
青樓薄暮難消遣白雪漫天愁殺人冥冥漠漠春無極
此時唯有楊花色一朝風雨薜蘿爛獨摻垂條三歎息

漢京篇

李夢陽

漢家臨帝極複道衆星羅烟花開甸服錦繡列山河山

河自古稱佳麗城中半是王侯第峻閣重樓夾道懸雲
房霧殿森虧蔽牧豚賣珠登要津樊噲亦是鼓刀人時
來叱咤生風雨奄見吹噓走鬼神平津結兄蓋侯弟杯
酒相看何意氣執鞭盡是虎賁郎守門不說長安尉長
安烽火入邊城挺劍辭君萬里行去日千官遮馬餞歸
來天子降階迎朱弓尚抱流沙月寶鉞常飛瀚海星不
分燕然先勒石直教麟閣後標名豈知盛滿多仇忌可
惜榮華如夢寐第宅田園奪與人丹書鐵券成何事霍

氏門牆狐夜號魏其池館長蓬蒿三千劍客今誰在十
二珠樓空復高後車不戒前車覆又破黃金買金谷洛
陽亭榭與山齊北邙車馬如雲逐陰郭豪華真可憐雲
臺將相珥貂連當時却怪桐江叟獨着羊裘伴帝眠

行路難

何景明

牀有織綺篋有織素請君視綺還視素憐新不如莫棄
故樽中有酒盤有餐聽我為歌行路難衆中懽樂多志
氣豈知他人不得意白日有時不照地安能保君常不

棄天河熒熒西北轉織女牽牛不相見由來天上亦別離何怪人間有悲怨世情磷薄惡衰賤駕車馳馬如雷電少年不得君愛惜紅顏勝人亦何益

田子行

何景明

我持彤管雙鳳翎浮沈帝旁近紫庭文園著書久消渴據地酣歌常不醒長安少女花在側茂陵美妾空娉婷漢皇不好相如賦方朔誰知是歲星

吳偉飛泉圖

何景明

長安獨過田子舍留我一翫飛泉畫絕壁如聞風雨來
晴天安得蛟龍挂吳生跌宕得畫理潦草落筆皆可喜
飛泉却出沓嶂間山即真山水真水客堂六月生畫寒
耳中彷彿高江灘江灘窈窕不可測波濤洶湧多奇觀
泉邊三老顏色異偶坐似是莊與惠萬里誰論到海心
百年詎識臨淵意偉哉田子今儒宗文標南指匡廬峯
不須對此更惆悵會看瀑布青天上杉風松日隔縹緲
雲瀧雪瀨何雄壯我常夢往神空向豈無吳生好手筆

為我寫寄廬山障

畫魚

何景明

大魚昂藏若人立衝波跋浪風江急傍觀二鯉各有神
倏忽波濤隨出入中堂髻鬢動杳冥坐久始識為丹青
青天萬里拂絹素筆力咫尺開滄溟禹門天地雲霧裏
白晝雷霆行地底何人有力移置此酒酣相視一改容
只愁化作三蛟龍

金陵歌送李先生

何景明

李公為舅有呂甥甥舅四海皆知名呂君關西昨日去
公自金陵來復行金陵江水無斷絕金陵之山高截截
龍虎千年抱帝京星辰萬里羅天闕白鷺洲前芳草歇
清江浦上看明月燕山北望花如雪

子昂畫馬圖

何景明

學士宋王孫畫馬皆龍姿曾寫飛黃出天廐尚留雲影
落瑤池池頭馬官錦靴袴長牽緩鞚時時顧萬里精神
開絹素百年毛鬣生風霧吁嗟內乘無人識想見奔騰

過都國翠仗朱軒數往來金羈玉勒增顏色只今天子
罷南征又聞東巡遼海城安得此馬忽然生登壇一顧
千金輕天上常隨八駿行

寄顧華玉

徐禎卿

去歲君為薊門客燕山雪暗秦雲白馬上相逢脫紫貂
朝回沽酒城南陌燕山此日雪雰雰祇見秦雲不見君
胡天白鴈南飛盡千里相思那得聞

結客少年場行

唐順之

長安少年膽氣粗生來恥作轅下駒買交不惜千金意
使氣能拚七尺軀探丸夜入平陵郭走狗時過渭水隅
朱門傾蓋爭言晚白首同心不願餘俠士由來重然諾
一言妻子堪相托魯國朱家不學儒洛陽劇孟偏能博
別有侯王勢絕倫朱甕甲第接天闥蕭朱自倚金貂貴
班許元稱肺腑親青牛翠幃朝朝合錦瑟朱絃夜夜新
門下俱為驚座客堂中皆是報恩人當時顧盼生光彩
自矜意氣常無改何言榮華有沈銷雲散星分在一朝

舊客誰過竇車騎新知盡入霍嫖姚始知富貴多親故
始知貧賤多辛苦他年北闕競彈冠今日南山空射虎
積薪前後遞相踰一生一死交懸殊獨有子雲甘寂寞
閉門自草太玄書

歲暮贈于鱗

許邦才

長卿慕人千載前何似與君俱少年子雲期人千載後
何似與君俱白首君有仙才自不知顧我逃禪衆所嗤
擁褐閉關志偃蹇買山百里猶嫌淺終年藥裏清羸疾

深夜高吟獨抱膝興來攝客登華巔醉去目客談劍術

于鱗罷官歌

王世貞

人間奇事竟何限
李生掉頭西出關
金魚紫衫擲中道
曳耒長耕厯下山
巨靈高掌撫不住
玉女喻嚳愁雲鬢
山東海岳奮生色
星辰錯落雄其間
雕鏤萬象挾元氣
從此天翁不得閒
詞場鴈行忝王李
悵望逸翮那由攀
燕京冠蓋但嵒嶮
狂夫往事猶能說
酒歇哀絃下風雨
劍舞急調排虹霓
有客十詩九不道
布衣吾儕甘折節

鳳凰池頭失傲吏餘子散作中原別已許骭髀驕青雲
復得飄零鬪白雪誰其遠遊足暢意五斗往往搖余舌
嗚呼李生太奇絕贈生兩丸弄千秋騎一黃鶴覽九州
君不見古來豪傑多自量屈宋焉敢兼巢由

慰明卿再謫

王世貞

明堂堂成不見帝十二牧伯朝逡巡丞相肩輿入內殿
搖筆一掃三千人王生束裝視黜籍乃見武昌吳國倫
無官可謫左已久有地足徙恩仍新甘泉諸貴氣成雲

吳也舊是甘泉臣小臣無狀業萬死尚許短檄隨風塵
長沙坐中止鵬鳥魯東門外悲麒麟何方魑魅不撫掌
何處猿猱不鼓脣李侯杜門十月矣喑女再黜奚其陳
此時尺一馳南康府主抑揄目吳郎卷衣大笑出府舍
一舸乘風上武昌匡廬五老宛相揖長江九派流飛觴
歸來蕭條四壁立大嬖許罵小嬖傷女等徒稱擅金石
豈無宗徐李與王時從處士誇鸚鵡可掾文君典鸛鷖
何物故人能見負却令妻子狗文章啼寒泣飢苦未已

東馳西竄窮遐荒燕中炊米若炊玉公田種秫不種秔
貢家車馬誰與買季子貂裘胡計藏解道人間富官職
女豈不念頭上霜吳郎欲答答不得王生請為歌夙昔
日者歲之丙辰前五星猶聞在奎壁片語高呼白雪飛
寸心肯讓青雲色天台少年強解事吳郎目懾遺其舄
豈唯吳郎衆辟易但語吾曹少堅敵司空撾鼓獨裸袒
武安行酒半膝席小兒僅呼楊德祖一錢可擬程不識
但聞曹中理公事君其且看西山碧故知萬變同翻手

風雨青天晝能吼遺舄少年座上坐誰哉捧案前奔走
世人榮辱強相制吾輩行藏終自取妻子寧須饒遠略
且用七尺餌其口即使女官更削盡豫章男子得活不
女乏江陵千樹橘來共吳門千畦韭耕盡要離墓上雲
洗眼看他竟何有

送許永寧

王世貞

許生少小青雲客一日交遊滿東國是時厯下李于鱗
往往道汝文章伯薊門紅塵萬楊柳五馬忽停趙州守

吾徒零落聲華盡且復低眉事奔走清霜片片照吳鉤
北斗插地河西流要知肝膽酒邊露還是當年荆叢儔
有道何妨且棲止獨棹天南破盤水未容魑魅快時人
尚有頭顱辨山鬼攜手慷慨河梁篇丈夫微名安足憐
眼前離合差挂意此輩豈與千秋權

送李于鱗守順德

徐中行

去春從君燕市遊眼前諸子同杯酒今春送君河梁上
爾我躊躇自攜手大雅沈淪況已久吾儻相逢信非偶

乾坤反覆賢豪至百年麟鳳生郊藪孝宗作者李與何
力挽江河始東走君也蚤得哲匠心玄夜昭回開北斗
睥睨堪凌異代人招攜復得同心友竭來陸沈郎署中
玉石蒼茫竟誰剖王生披覩自青年謝客陰森回白首
余之同袍梁與宗感會風雲成不朽嘯侶頻過碣石宮
善謔清懽何不有席上揮毫烟霧飛燈前擊劍風雷吼
喑噉雄辯謝雕龍等閒世事同芻狗嗟哉此意人知否
世路風塵莽荆棘相知歲月違南北褰帷君遂守扶風

執戟余猶滯京國酒殘日落君當行且復斯須岐路側
纏綿奇樹本連枝婉孌鸛雛分比翼龍劍精靈雖共存
瑤琴神理終誰識平生知己自君盡別後何人寫胸臆
趙地曾誇三輔豪意氣環奇自疇昔士慕平原有處囊
予懷鉅鹿無終食卧閣春風鼓瑟聲行軒明月連城色
秋日如逢北使來報書慰我長相憶

月下吟

汪時元

客裏年年滯吳越鳳凰山上望秋月空山無那白雲寒

秋風蕭蕭吹短髮明月照我我徘徊強斟綠酒心欲摧
白雲倏忽成蒼狗功名富貴安在哉館娃宮越王臺
只今惟見蒿與萊寂寞沈吟孤月下愁聽江聲長夜哀

古今詩刪卷二十四

欽定四庫全書

古今詩刪卷二十五

明 李攀龍 編

明五言律詩

送謝恭

劉基

涼風起江海萬樹盡秋聲
搖落豈堪別躊躇空復情
帆過京口渡砧響石頭城
為客歸宜早高堂白髮生

太公釣渭圖

劉基

璇室羣酣夜璜溪獨釣時浮雲看富貴流水澹鬚眉偶
應非熊兆尊為帝者師軒裳如固有千載起人思

望孤山作

劉基

返照千山赤寒煙一島青羈心霜下草生態水中萍黃
屋迷襄野蒼梧隔洞庭空將垂老淚灑恨到滄溟

旅舍

梁寅

寥濶山林迹淒涼江海情巴歌從俗好楚服為人輕把
劍秋風起憂時白髮生黃金雖所貴未敢論縱橫

送宿衛將出守鄧州

高啓

中郎身領仗宿衛在承明
舊射雙雕落新乘五馬行
紅雲搖魏闕白水近襄城
好勸諸年少春來賣劍耕

長安道

高啓

長樂鐘聲動平津樹色開
中郎長戟衛丞相小車來新
成賜將第更築候神臺誰念
文園客空懷作賦才

江村雜興

楊基

拚醉望愁醒愁因醉轉增
已歸仍似客投老漸如僧詩

興風樓笛棋聲雪舫燈莫言渾不解此事野夫能

登岳陽樓

楊基

春色醉巴陵
闌干落洞庭
水吞三楚白
山接九疑青
空闊魚龍舞
嬋娟帝子靈
何人夜吹笛
風急雨冥冥

送曾伯滋赴西河將幕

徐賁

上將初分閫
儒官解習兵
風旗春獵野
雪帳夜歸營
洮水從岷下
祁山入隴平
知君能載筆
草檄報邊聲

宿真慶菴

唐肅

落日古城陰蕭蕭竹樹深
雨花知佛境流水識禪心
月到翻經榻苔緣挂壁琴
不因支許舊那得遂幽尋

秋夕懷張山人

藍澗

鼓角邊聲壯林塘夜色幽
涼風動疎竹明月在高樓
久客形容老孤城戰伐愁
不眠懷魏闕長嘯拂吳鉤

雨中同孟原僉憲登嘉魚

藍智

高閣流鶯外荒城駐馬前
江寒三月雨春老百蠻天
折柳悲橫笛飛花落釣船
乾坤總羈旅把酒意茫然

舟夜次查口東蕭鵬舉

劉崧

扁舟汭綠嶼雙櫓折蒼波秋氣水邊早月明江上多魚
龍今夜冷鴻雁幾時過去住關幽興歌眠聽棹歌

張氏溪亭雜興

劉崧

草閣經秋淨柴扉近水開霜林收橘柚風磴坐莓苔釣
艇寒初放樵歌晚獨回城南車馬地欲往更徘徊

寄馮朝泰

李德

金陵昔會面一別杳無音故國秋雲合大江春水深宦

情同契闊老景各侵尋縱有衡陽雁何由寫素心

出塞曲

林鴻

玉關秋信早未雪授征衣王者應無敵胡塵不敢飛三
河兵氣盛五道檄書稀日晚笳聲發將軍射獵歸

題福山寺陳鉉讀書堂

林鴻

窮經不出戶一室古珠宮燈影秋雲裏書聲晚磬中開
窓明竹雪散帙落松風料得無人到焚香對遠公

懷何士信謫西河

浦源

全家離故鄉萬里謫窮荒草木踈邊境牛羊繞帳房風
聲連雨雪漢語雜氐羌遠念平生友行吟淚數行

送張二貢士

章閭

煙靄散春晴亂鴉深樹鳴千山懸落日一騎出孤城急
管催離宴飛花亂旅情慙慙懷上策謁帝向承明

題林尚寶泮池書臺

周玄

逸士多佳趣開窓對古池遠山晴後見明月夜深期荷
氣通書幌藤陰落酒卮寥寥心境靜此外復何為

九月晦日感懷

章表

長嘯拂吳鉤南圖惜壯遊乾坤同逆旅風雨忽窮秋牢
落莊周劍飄搖范蠡舟行藏吾敢必天意信悠悠

晚過獅子林蘭若

姚廣孝

無地堪逃俗乘昏復到林半山雲過磬深竹雨留禽觀
水通禪意聞香去染心叩門驚有客想亦為幽尋

賦得滄浪送陳景祺守襄陽

楊士奇

漢水帶襄城滄浪舊有名分符來五馬如練照雙旌濟

涉思為楫聽歌想濯纓須令郡人說堪比使君清

李郎中粉署餘清卷

王洪

鳴佩趨丹闕焚香坐粉闌禁城鐘鼓靜人吏簡書稀幽
鳥鳴高樹涼風動紫薇明時仍宦達誰不羨恩輝

舟中雜興二首

王洪

故國偏芳草高臺多大風河山千古在登眺幾人同野
澤鳴山雉荒陂起塞鴻新豐不可見煙樹五陵東

其二

曠野杳無際孤舟齊魯間
河流東下險天氣汙回還
古道蒼煙迥長亭落照間
微茫雲水外一點是梁山

夕景樓

陳璉

獨倚闌干久涼風滿客衣
樹從京口斷山到海門稀
雁影橫秋色蟬聲送夕暉
蕪城纔咫尺樓堞望中微

送金諭德扈從征虜

王英

駐蹕陰山下分營瀚海邊
春光明玉帳殺氣薄胡天
鼙鼓雷霆震旂旂日月懸
叅謀有籌策前席屢承宣

送積中上人歸天竺 李時勉

承恩辭北闕飛錫返東林
柳帶天邊雨松迴巖際陰
談空青嶂曉戒臘白雲深
坐對湖中月能忘去住心

送人南歸 李禎

離絃兼楚調忍向醉時聞
連歲長為客他鄉更別君
鷗波明夕照雁字寫秋雲
迢遞還家夢相隨過海門

賦得暮雨送李胄 張栻

微雨滄波路孤舟薄暮時
雁迷歸浦早雲濕度江遲
白

日青山暝芳洲碧草滋紛紛對華髮相看總成絲

遊仙詩

羅頤

幽徑赤城顛松蘿九曲連千林喧藥杵一嶂起茶煙深
竇源通海層崖樹隱天攜琴就猿鶴同種玉峯田

題姚公綬山水

張寧

幽意寫不盡萬山深更深白雲無出處綠樹漫成林啼
鳥醒人夢流泉淨客心何當隨釣艇看奕草堂陰

送羅時泰憲副兵備瀘叙

李東陽

劍閣攬天起巴江劃地流駐兵曾六鎮分臬比諸侯社稷須長計乾坤有壯遊安攘非兩事慎勿倚戈矛

靜海驛

文林

深夜驛途靜長河瀚海通舟明沈水月燈暗落潮風暝色浮煙外春光欲雨中年年苦行役踪跡任飄蓬

江南旅懷

楊時秀

客夢家千里鄉心柳萬條片雲遮海嶠一雨送江潮戀闕綈袍在懷人尺素遙春光看又晚何處灞陵橋

彭城有懷

儲巖

清夜棹歌發高秋客思生綿綿鄉國夢歷歷水雲程老
樹危蟠石衝波怒啣城白門樓上月偏傍海東明

郊壇值雪

李夢陽

鳳輦連霄發雞鳴雪滿畿嚴隨黃鉞至輕繞翠華飛伏
謁深沾珮朝回半濕衣懸知清切地沖默迓天威

朱遷鎮廟

李夢陽

宋墓莽岑寂岳宮今在茲霜風留檜栢陰雨見旌旗百

戰回戈地中原左衽時土人嚴伏臘偏護向南枝

銀山寺

李夢陽

銀山湯嶺北天外削三峰下見林中寺來聞午後鐘僧
徒住石屋雷雨拔門松西望諸陵接雲成五色龍

南湖

李夢陽

北山已奇絕逾嶺復南湖石磴相迴互巖泉乍有無開
窓衆壑積當殿一峰孤更攬千林竹因懷長嘯徒

豐安

李夢陽

地氣南逾熱僧林晚暫栖雲開一江去日在萬山西修
竹涼風至昏鴉古木齊凭高忽灑淚清世有征華

五老峰

李夢陽

東南濤浪吞五老古今存秀色彭湖浴諸峰廬嶽尊中
宵見海日北斗豁天門霜雪顏常淨雲煙解變魂

折桂寺

李夢陽

折桂何朝寺開基分翠峰窻明五老雪門掩斗崖松泉
瀑飛人過香臺印虎踪千巖誰得到百里但聞鐘

團山登望

李夢陽

團山當縣口石壁對朝饒日靜湖波斂天低島色遙風雲餘伯氣吳楚混前朝秋水年年落英雄恨不消

芝山

李夢陽

吳楚分何代乾坤此郡孤江從樹裏斷山入雨中無戰鬪名空在英雄世與徂酒酣撫長劍極目盡重湖

明遠樓春望

李夢陽

貢院初開閣春陰獨倚欄柳邊千艦聚花裏萬家殘風

雨江聲壯兵戈地色寒
斷腸沙雁北羣起向長安

送秦子

李夢陽

梁國秋砧滿范陽風葉稀
如何故人去不與雁同飛
北路薊關古天寒易水微
君行莫悲霧霜日指南輝

送人還關中

李夢陽

見君驅馬去忽起望鄉思
華嶽寒逾峻涇河繞自遲
躬耕來谷口把釣向皇陂
何日一樽酒終南對不移

秋日王子臺上

李夢陽

暑霽名王會臺成貴客過清秋
踈草木落日上笙歌
天地銜杯盡風雲傍檻多
聖明今御極誰復慮干戈

晚過孟氏雷雨驟至王子亦來

李夢陽

孟嘉真畏友王粲復多才
下馬雲際暮開樽雨驟來
疾雷當戶落驚電觸簷回
坐久明星出無煩曉漏催

再送白帥

李夢陽

聖主下龍章將軍入鳳陽
地盤淮海壯天擁孝陵長
檠戟新開府威名古辟疆
卜年元萬世王道是金湯

和鄭生行經鳳陽

李夢陽

浩蕩興龍地盤旋翥鳳形
海吞淮水白天插楚峯青
帝宅精靈聚陵宮虎豹扃
萬年禋祭禮有道賴朝廷

鄭生至自泰山二首

李夢陽

昨汝登東嶽何峯是絕峯
有無丈人石幾許大夫松
海日低波鳥巖雷起窟龍
誰言天下小化外亦王封

其二

俯首無齊魯東瞻海似杯
斗然一峰上不信萬山開
日

抱扶桑躍天橫碣石來君看秦祖後仍有漢皇臺

中秋南康

李夢陽

同是中秋月匡廬只自看故臨石鏡上偏傍落星灘北
望關山隔南飛鳥鵲寒鳳歌喧太液光滿憶長安

己卯元夕

李夢陽

此夜門還閉中天月自看春催桂應發雪映兔猶寒兒
女添燈鬧鄰家品笛殘少年思可笑走馬向更闌

九日上方寺二首

李夢陽

賞時爭上塔乘月復登臺地盡中原入天空秋色來望
鄉番恨雁有菊且銜杯却憶龍山帽徒增醉者哀

其二

天地踈秋色樓臺敞客歌遠江寒自白落木晚堪多月
為銜杯出鴻於鳴磬過霜橫不歸去吾意在煙蘿

雨後朝望

李夢陽

半夜雷驅雨清晨潦映空起看南偃樹知是北來風宿
霧籠初日晴天減斷虹劇心時序晚遮莫傅巖功

獄夜雷電暴雨

李夢陽

一雨暮何急孤眠宵未央
疾雷翻暗壁落電轉空梁
勢極千山動光還萬里長
天威終不測魑魅可潛藏

野風

李夢陽

山鳴野風至漢水白蕭蕭
月漉魚龍醒雲蒸豺虎驕
有家驚節物不寐想前朝
萬古英雄跡江城夜寂寥

河上秋興二首

李夢陽

日立秋林淨江清旅思微
黃葉雨後積白酒客來稀
今

古三川地乾坤一布衣獨行吟望苦沙海鴈還飛

其二

白馬瓠子口秋風汾上歌帝鄉不可見千載白雲多樹
動江帆至霜前塞鴈過滄洲無盡極慷慨有漁蓑

懷李獻吉

何景明

冠蓋京華地斯人獨可哀神龍在泥滓朱鳳日摧頽世
路無知己乾坤孰愛才梁園別業在何日見歸來

寄王職方

何景明

北望依南斗長安萬里愁西風入上苑楊柳落金溝雲
近蓬萊闕天迴太液流仙郎歸畫省高詠接同遊

雨後次孟望之

何景明

萬里看無際高秋接素氛江村昏片雨石壁斷孤雲鴻
鴈常求侶鳬鷗不離羣寒山有落木風起暮紛紛

西郊秋興

何景明

嚴風日以發落葉已紛紛遠樹斜銜照寒山半入雲步
兵常嗜酒水部自能文悵望千秋上斯人亦不羣

送羅秀才歸省

何景明

汝念高堂母還家秋色深遙知倚門望應慰斷機心落
葉清淮朗浮雲楚塞陰西風吹匹馬惆悵送歸吟

寄張伯純提學

何景明

舊屬朝端望俱稱柱下才九霄驄馬出千仞鳳凰來河
洛經中嶽星辰動外臺山城有桃李花向幾時開

送楊太常

何景明

聞說西南寇猶多虎豹羣過秦應有論諭蜀可無文未

返巴山使空懸棧道軍煩將父老意歸報聖明君

玉泉

何景明

行遊金口寺坐愛玉泉名雲去隨龍女風來動石鯨入
宮朝太液穿苑象昆明却望天河水迢迢萬古情

送彭總制

何景明

蜀道青天上岷山赤日西九重連授鉞萬里動征輦開
府松沙靜懸軍玉壘低知公安蜀計諸葛大名齊

盜起

何景明

盜起從畿甸徒勞將帥心徵兵搖白羽募士散黃金天
地河嵩隔風塵海岱陰萬方吹畫角此曲淚沾襟

送李體仁按雲南

何景明

漢使西南域天王節制名九霄看鳳下萬里避驄行風
偃蠻夷靜霜驅瘴癘清壯遊仍攬轡從此慰平生

十四夜集良伯宅

何景明

陶令堂中月深更酒為攜金波流未滿白露迥含淒鴻
鴈秋江北芙蓉漢苑西一杯同悵望萬里各羈棲

送郭刑部守寧波

何景明

漢庭黃綬吏西省白雲司豈謂為郎久猶言出守遲雲
霄懸賜履江海入褰帷古越今名郡風流當在茲

寄王康呂三子

何景明

鄠杜終南曲邠岐渭北陸水多龍臥處山有鳳來時星
宿中宵動風雲萬里移滄江問靈劍離合少人知

寺中齋居簡崔內翰張侍御

何景明

徑雪草生細林寒鶯到稀傷春懷二子齋沐掩禪扉石

室栖金馬天花落繡衣分明共朝寺鸛鷺不同飛

殿試宿禮部和馬張二光祿喬直閣諸公

何景明

東殿春朝晚南宮夜宿深鎖闥猶月色開閣更松陰地
迥神仙接天高象緯臨諸君清廟作三歎有餘音

贈王舉人

何景明

王子萬人英詩名何日成驪珠眠自抱天馬傍誰行旅
食青楓改秋吟素髮生過逢見汝意潦倒愧吾情

皇陵

何景明

陵閣皇靈閔山河王氣遙萬年龍虎抱每夜鬼神朝玉
盃留天地金燈照寂寥如看翠華度縹緲在青霄

鑑公房石燈

何景明

石盃何年鑿瑤燈此夕然雲流自五嶽月色近諸天定
裏金輪轉光中玉鏡懸西來不滅影常照法筵前

登塔

何景明

古塔層城畔秋毫萬里看登高携賦客落日眺長安天
地懸相抱江山鬱自盤誰能絕頂上不避北風寒

駕出

何景明

九重玄武仗萬歲羽林軍
朝帝乘輿出行天警蹕
聞螭頭蟠曉日雉尾拂
春雲佇望南郊氣遙連
北斗文

大祀

何景明

金榜星辰幕瑤函海岳
編受禧同漢室登禪異
秦年日抱龍旂轉天流
羽蓋旋揚雄老陪從白
首賦甘泉

題蘇子瞻遊赤壁圖

何景明

垂老黃州客高秋赤壁
船三分留古跡兩賦到
今傳落

日寒江動青天斷岸懸畫圖誰省識千載尚風煙

送汪器之司成還南京

何景明

帝宅龍盤內儒林鳳覽中此來名益重相送意無窮
畿甸江山抱宮牆日月通仙舟上南斗攀望綵雲空

關門

何景明

虎衛關門迥龍沙塞曲深風雲時有氣日月晝長陰中
使西來訊千官北望心天寒漢宮闕翠蓋憶春臨

寄中丞彭總制

何景明

湖海藏身遠朝廷屬望頻
駿功收戰伐龍臥偃經綸
星宿黃河氣風雲華嶽神
生才元有待終起慰斯人

說經臺

何景明

西海何年去南山萬古存
風雲留福地星斗上天門
有欲誰觀妙無為自覺尊
青年不復返空誦五千言

望終南

何景明

近覽終南霽遙迎斜日曛
黛橫千里色花挹五臺雲
城闕行相映川原望轉分
丹梯懸古洞未訪石霞文

送賈郡博赴階州

何景明

十載一儒官西行道路難
羌夷應俎豆邊徼有衣冠
隴阪盤雲止秦城向斗看
好音懷萬里早晚報長安

寄題丹陽孫氏七峰山房

何景明

閩爾山房勝青天秀七峰
芙蓉疊日月雲霧裊杉松
塔倚山巒積愆通洞壑重
源潭暗雷雨白晝有蟠龍

古今詩刪卷二十五

欽定四庫全書

集部

古今詩刪卷二十八

詳校官中書_臣李 采

侍讀_臣孫球覆勘

總校官庶吉士_臣倉聖脉

校對官待詔_臣胡士震

謄錄監生_臣俞昌言

謄錄監生_臣莫與儔

欽定四庫全書

古今詩刪卷二十六

明 李攀龍 編

明五言律詩

在武昌作

徐禎卿

洞庭木葉下瀟湘
秋欲生高齋
今夜雨獨臥武昌城
重以桑梓念淒其
江漢情不知天外鴈
何事樂南征

九日

邊貢

白日寒城暮，清秋畫角哀。
地偏妨採菊，鄉遠怕登臺。
鴻鴈天邊去，風雲塞上來。
故交零落盡，杯酒向誰開。

泰陵供事述感

邊貢

陵寢居庸近，山深地轉饒。
雄關三鎮鎖，幽府百靈朝。
堡堠烽全息，屯兵甲半銷。
帝心遙可識，終古絕天驕。

下陵

邊貢

露行踰十里，夜黑四巖陰。
不辨雲霞色，惟聞鐘磬音。
塹鴉翻列火山，鬼肅空林欲下西陵路。
前溝水正深。

郊壇邊貢

晚步凌高榭春空月正明星風臨漢時樓觀俯神京靜
夜松飈響豐年穀日晴同心隔城市相望轉盈盈

贈何子元二首

邊貢

飲馬長城窟秋風隴水清旌旗連朔氣笳吹咽邊聲鹿
塞胡霜白龍沙漢月明共嗟班定遠身是一書生

其二

萬里窮邊客三秋出井陘金杯揮綠酒斑管代青萍吏

識終軍貌人瞻博望星歸來市駿馬持節報明庭

張秋曹元德席上留別

邊貢

春日江陵去煙花萬里途山川留故郢舟楫帶三吳樹
杪湘流轉猿聲秋月孤郡樓登望夕天北是皇都

村居

薛蕙

寂寞村居僻荒蕪草徑深飛蓬來曠野啄木響空林薄
暮聊凝望清江正苦吟此生甘落魄自笑果何心

寄徐給事

鄭善夫

黃門今要地白下舊神京
令弟煩相問憐君抱重名
歲星遠自照諫草未全行
莫作東山臥秋風戀主情

東顧華玉

鄭善夫

昔在過逢日天台山雪生
何期臨易水惆悵赤霞城
杯動青春色琴含滄海聲
終焉謝朱紱攜手石梁行

吳徵君山居

鄭善夫

吾慕漢陰老清風難具論
兒童少機事麋鹿到柴門
備見幽人吉還聞靜者尊
懸知出世意握手入湘源

送李明德應詔赴闕

鄭善夫

為別語難盡相看情益親
風雲感壯士江海召幽人
道已干時禁才仍與世屯
飛騰吾豈敢君自出經綸

晚霽

孫一元

晚來初雨霽煙火隔林微
一徑羊牛入孤村桑柘稀
長天下遠水積翠落巖扉
月黑聞人語南溪種樹歸

避寇吳興山中

孫一元

日暮漁樵散山空河漢明
柝聲悲永夜戎馬閉孤城
去

國美人盡感時黃葉生酒杯徒自好極目一沾纓

幽居

孫一元

萬事歸來好幽居養性靈可須栖白社不必草玄經投
老丈人行生成處士星相過君莫問身世一浮萍

毘盧閣同伍疇中諸公西望

高叔嗣

客來常一上對此西山平向夕簷楹立憑虛閣道行楊
花飛暮野雨色動春城却戀同携手都忘羈旅情

晚趨忻口

高叔嗣

雲峰聊極目立馬獨愁心豈直關山遠其如雨雪深
聲先入夜邊氣迥生陰疇昔長征意蹉跎力不禁

宿周山人南池

王廷相

暝投山際館飯罷月中行為坐松杉影因留池沼情蓮
花心不染秋水夢俱清問我中宵意謝家春草生

懷張孟復

王廷相

秋光澹煙樹遠思夾愁生之子今何在飄搖紫鳳城清
風灑劍珮白日到蓬瀛青鳥書難託歲華空屢驚

郢城最高處眺荆楚

王廷相

石城聊引望三楚渺茫間峽自中流闢江從西極還荆
襄天設險鄂岳水為關用武非今日風雲到處間

石井別業

王廷相

花暗棠梨浦禽鳴桑樹林濃霞淹曙色微雨作春陰田
父班荆坐漁翁濯足吟偶來人境外銷却宦遊心

屏裔

王廷相

縣城如黑子秋怯海門濤蜃出雲霞集潮平島嶼高乘

桴傷大聖屏喬愧吾曹挂席蓬洲近年來興益豪

入斜谷

王廷相

宛宛褒斜谷微茫鳥道穿龍江盤地出雲棧蹴空懸遠
控三巴國遙通百粵天茲游窮絕險不說舊行邊

別劉尹良貴

王廷相

與子意不淺襟期忽此違江湖一相送鵷鷺各分飛世
難幾時靜宦情今已微那堪值搖落風露入秋衣

登天柱閣

胡纘宗

與客上江樓橫江山欲浮雲當天柱出月傍小孤流帆
外收吳楚尊前落斗牛瀾漫忽千里倚檻思悠悠

病瘍初愈文太史過訪

袁袁

杜門成市隱習靜好樓居不以文園病寧來長者車庭
閒喧鳥雀竹翠淨琴書客散玄言罷蕭然掩敝廬

十二月朔旦候駕出南郊

楊慎

天仗雲門外宵衣晚漏前蒼龍旂影動朱鷺鼓聲傳星
爛甘泉燭霜清泰時煙南郊新警蹕重覩孝皇年

錦城夕

楊慎

錦波沈霽色丹樓生晚輝江光二流暝橋影七星稀猶
明叔度火未息文君機南陌駉駉度東城鐘漏微

宋玉宅

楊慎

文藻三閭並幽懷九辯知雲為巫峽賦雪作郢中詞茅
屋還遺址蘭臺異昔時鴻裁誰獵豔空自拾江蓠

咸陽

楊慎

帝里繁華歇神皋歲月多秦城依北斗渭水象天河顏

堞無遺土驚川有逝波丘陵沈霸氣松柏起悲歌

寒夕

楊慎

東西垂老別前後苦寒行旅髮年年禿羈魂夜夜驚春
鉏胃內貯石關口中生讀書有今日曷不早躬耕

十五夜旅懷

唐順之

暫輟明光草言從洛下遊塵沙兩河夕風雨二陵秋鏡
有潘郎鬢囊無季子裘更堪三五夜獨自下西樓

過堠陽山居

華察

林泉愜嘉遁乘興訪幽踪
野曠餘寒照山深多亂峰
潭煙生暮色水木澹秋容
不是桃源地虛疑物外逢

惠山寺與施子羽話別

華察

看山不覺暝月出禪林幽
夜靜見空色身閒忘去留
疎鐘隔雲度殘葉映泉流
此地欲為別諸天生暮愁

歲晚過圓通寺

華察

扁舟一乘興歲晏訪禪林
落日空門迥長松古殿陰
溪聲晚風急野色寒雲深
坐入無生境因窺靜者心

再過任大理別墅 華察

溪南讀書處秋晚數經過寒照隱城樹蒼煙深壁蘿
窓明山翠近地靜葉聲多叢桂空巖暮徒懷招隱歌

初春寄李于鱗 皇甫濂

卷迹同休汝遙懷歲復深春雲藏白室芳意上青林
夢憶攀嵇日書裁御李心無令願空谷世路有華簪

宿省憶于鱗 皇甫濂

歲落悲郎署霜寒庭樹銷天涯明月近海岳片雲遙坐

惜圖書夜長懷鴻鴈朝旅魂能幾許別夢苦相招

軒下書懷簡于鱗

皇甫濂

匹馬歸郎署清風掩客居城霞初霽徹庭雪暮寒餘才
薄羞霑祿官慵苦對書因之念朋侶衰颯日令疎

奉答于鱗冬夜念及之作

皇甫濂

不堪逢盛世翻欲恨浮名白髮驚時益新詩羨爾成燈
前殘月上雪後早春生兄弟凋零日何能說宦情

紫騮馬

喬世寧

騶馬繫朱纓青雲躩蹠生千金堪一顧萬里為君行落
日城南戰悲風塞下鳴只愁流血盡不罷漢家兵

關山月

喬世寧

關山一片月揚彩射金微胡馬中宵動天街七暈圍將
軍橫塞角少婦擣邊衣為有刀頭望長看破鏡飛

金州餞席留別

俞憲

別筵臨海嶠去住若為情臺迥雲連幕潮回月滿城千
峰當鏡出萬壑入杯平擬作從軍樂秋風笳吹聲

金天月
卷二十六
天寧寺月天禪房

李孔陽

河橋布金地小可結僧房孤月澄虛寂諸天映渺茫雲
開石鏡徹花覆佛龕香坐久遺塵却談玄欲面牆

長夜集王元美

吳維嶽

雨過禁鐘清分曹此合并炎時河朔興詞客建安名月
射青樽動花依絳燭明不妨深夜醉歸騎御街平

溪上晚歸

李汝蘭

徑路草萋萋歸人咫尺迷水聲聞犬吠月色見雞棲露

下沾衣濕星垂挂樹低今宵有風雨多在杜陵西

天寧寺對雨同殷正夫李于鱗賦

謝榛

諸天忽風雨蕭颯動山扉殿冷鴿逾靜鉢空龍未歸曉
留軒冕客秋到薜蘿衣後夜懷支遁遙聽鐘磬微

送張太僕視馬畿內

謝榛

太僕巡畿甸飛旌指冀州共傳天馬出寧復大宛求月
照昆吾冷風生苜蓿秋張衡近多賦獨繫漢家憂

水月寺桂花

謝榛

桂花秋正發禪宇更徘徊我愛淮南種今當薊北開清
芬對祇樹金粟見如來幽興餘康樂東林夜不迴

榆河曉發

謝榛

朝暉開衆山遙見居庸關雲出三邊外風生萬馬間征
塵何日靜古戍幾人間忽憶棄繻客空慙旅鬢斑

送樊侍御文叔之金陵

謝榛

地入淮陽路天分牛斗墟秋帆二水外春草六朝餘冰
雪生官舍風塵走諫書從來知國士豈亦念樵漁

夜雨殷翰林書齋

謝榛

暝色投仙館，開樽秉燭時。
論文關世變，下榻見心期。
金馬天逾迥，銅龍漏轉遲。
秋來易風雨，長此寄相思。

元夜道院同于鱗元美五君賦

謝榛

長空月正滿，遊騎隘京華。
夜火分千樹，春星落萬家。
乘間來紫府，垂老問丹砂。
笙鶴知何處，依稀見綵霞。

送許中丞歸秦

謝榛

官起風塵際，身歸兵甲餘。
曉星隨去馬，春雪上行車。
二

水堪垂釣三峯老著書白雲應不散長繞杜陵居

送楊萬戶歸關中

謝榛

青年知獻策白首愧論兵候火羽書動秋風龍劍鳴主恩重延攬將種易功名月下關山笛還吹出塞聲

送萬比部使湖南

謝榛

聖極仙帆色西南得勝遊雲開衡岳曉葉下洞庭秋白日懸湯網春風釋楚囚蒹葭正霜露千里思悠悠

冬夜集張茂參宅

謝榛

秉燭坐深更嚴城亂杵聲寒雲雙闕迥夜雪萬家明世
事青樽盡邊愁白髮生劍塵時一拂莫遣暗龍精

送謝給事封蜀

謝榛

使星巴蜀外漢節夜郎西樹斷分金馬江清見石犀王
孫重茅土天子錫桐圭異世懷張載應留劍閣題

宿淇門驛

謝榛

駐馬淇門夕空堂暑氣徂暝煙官樹合寒雨驛燈孤濁
酒聊幽興悲歌亦壯圖相違舊朋好三徑日荒蕪

暮秋大伾山同孟得之盧次梗賦

謝榛

勝遊兼故侶幽興且禪林石上晴雲合松間晚磬沈青
山無久客黃菊有歸心我自悲秋色樽前學楚吟

于鱗郡齋賦贈

謝榛

別來吾更老醉後爾能真詞賦偏憂國聲名實在人論
心對冰雪發調入陽春國士淹多難風塵誤此身

送盧次梗

謝榛

物議冰霜過才名歲月勞老來悲道路醉後益風騷漢

黨無文字燕歌自我曹一寒今范叔誰復贈綈袍

送劉侍御之扶風

謝榛

旌節發河陽風塵西路長
心懸隴上月威帶日南霜
入郡春隨馬談兵秋滿堂
于今汲都尉容易鬢毛蒼

不寐

謝榛

南征秋轉劇不寐夜漫漫
去住身難定漁樵計未安
旌旗遮海暗戈甲照江寒
選將須吏事功名老漢官

贈包明府

謝榛

青雲南國彥百里試才初賦稅多憂色聲名一薦書訟
庭春雪滿官舍古槐疎深夜無人見鳴琴窓月虛

寄張職方

謝榛

漠南春草長牧馬來胡王落月走邊檄淒風生戰場河
山燕獨壯兵甲漢猶強正爾掄才日緘書報職方

寄上孫丈人宗伯兼懷太史文和

謝榛

纔罷江南戰憑高動越吟濤聲翻日暮兵氣結秋陰聽
履青天近含香紫氣深世傳修漢史誰識二班心

老懷

謝榛

殘年百事過閱世幾人存
風雪雙蓬鬢窮愁一酒樽
交游能自定文字有時論
易了浮生意難酬國士恩

秋夜

謝榛

罷酒南樓夜脩然起越吟
關河雙鴈迴風雨一燈深
老破當年夢秋生久客心
故園常在眼去住總浮沈

送陸令之高要

謝榛

陸賈振清芬脩然思不羣
地轉湯泉脉天開漲海雲
潛

牛偏好武孔雀自成文既得鳴琴趣風流併在君

寄謝宋二職方

謝榛

掄才有職方粉署並為郎賦月猶梁苑悲秋即楚鄉鳳凰多在漢舟楫復興商最有江湖客悠悠意不忘

九月七日遊濟南南山同閭許諸君子賦

謝榛

一樽乘野興同賦攬秋光天迴雲全白山空葉半黃片言千氣象千載見文章海右多名士深知謝客狂

酬樊侍御文叔

謝榛

論兵何日定憂國此心同
節鉞長吟裏冰霜獨坐中
天留三殿疏人避雨都驄
莫道狂夫醉扶桑欲挂弓

從軍行

盧楠

玉塞飛沙淨金河布陣稀
彎弓明月滿按劍雪花飛
鼓角轅門合旌旗射獵歸
陰山鏖戰罷殺氣曉霏微

谷明府泉亭

許邦才

每愛揚雄宅時來問草玄
花間搖筆影竹裏出茶煙
壑走千山雨池喧萬樹蟬
風塵慙季子蘿薜見高賢

舟中

許邦才

客子常明發霜天正寂寥
移舟星在水解纜月隨潮
往事流波駛歸心帆影搖
更堪聞過鴈蘆荻共蕭蕭

新公館

許邦才

誰憐孤館夜煙雨坐南軒
浪迹真無謂微生自不原
箒林過夏密魍魎向宵繁
欲覓還鄉夢懸厓瀑布喧

將歸雜興

許邦才

南國淹留處秋風一再逢
苑霜移蟋蟀江雨墮芙蓉
買

酒人情厭題詩客思重萬山正蕭索不是涕無從

界亭早發

許邦才

雲霧饒三楚風煙共一亭霜華添白髮寒色暗青萍
逐客元同調騷人本獨醒當時憐屈賈此地未曾經

舟中雜興

許邦才

長路楊花盡孤舟事事慵櫓聲揉遠夢檣影直高舂
寒食愁中度春衣客裏縫鳳城知漸近遙見五雲重

古今詩刪卷二十六

欽定四庫全書

古今詩刪卷二十七

明 李攀龍 編

明五言律詩

紫駟馬

李先芳

沙苑紫驊駟雕韉錦絡頭千金能一顧萬里為防秋
跋飛塵下驂驪汗血流天閑十二種誰解取封侯

劉生

李先芳

談兵羞燕頤負氣持虬鬚朝彈上林雀夜醉酒家胡片
言傾四座千金直一盧撫劍平津道挾殺李金吾

留別于鱗

李先芳

李侯才卓犖文字逼先秦因無知己者不欲暗投人白
雲官舍冷綠酒別情親他日傳離思千山黃鳥春

鄱陽湖

李先芳

吳城臨古渡湖水接天開一夜南風起扁舟萬里迴波
漂星子縣雲沒大孤臺却望蒼茫裏匡廬秋色來

除夕雨雪

李先芳

除歲窮陰積遙天雨雪懸朝昏難辨日晦朔暗分年鴻鴈相將去梅花各自妍笑看兒女長老我大江邊

送張內翰赴院

李先芳

北人重然諾君子莫相忘萬里依兄弟三年吐肺腸侍臣金作礪太史玉為堂儻念羈棲羽天邊垂末光

楊花

章适

北來千萬樹總作雪垂垂亂引閨中思閒牽陌上悲悠

悠似春夢冉冉駐遊絲會見御溝水萍生葉綠時

儀興天寧寺浮屠

章适

峭絕更無羣河山眺不分恍疑楊子岸遙接洞庭雲初地真空闊人天易夕曛冥搜謝梯級超想出聲聞

寄于鱗四首

王世貞

遠樹太行壯亂流漳水深風雲來染翰河嶽映披襟鞭弭中原約車書異代心並驅吾豈敢或可效知音

其二

春色邢臺上獨吟千古愁
鼓行人自失聲折爾何求官
恐詩名奪才寧吏術收西來書一紙吾病欲全瘳

其三

春郊望不盡飛動意難禁
地轉漳流闊山連薊日深
安危吾長物貧賤爾初心
薄俗寧無畏高齋且細吟

其四

莫問除書意風塵彼一時
折腰君自苦鞅掌我何辭
客計深憐晚詩名未易卑
吳門耦耕地烽火受人疑

答于鱗二首

王世貞

向來憐影意豈謂欲騰驤
吾黨無中駟君才老太行
別筵人又改借箸策誰長
莫作懸車問浮沉總不妨

其二

為問長安態縱橫日與新
好龍兼廢似應馬遂為真
但自稱知己相留讓衆人
乘桴余敢從滄海浩無津

張氏園亭

王世貞

賴此多幽意還應事事宜
秋陰生檜早暝色赴花遲
侍

立顏如玉爭論肉勝絲君看廣陵散何異郢中詞

于鱗郡齋

王世貞

握手未能畢寒簞香滿樽白雲供使者秋色向何門一笑中原遇新詩異代論長安故人地車馬自言尊

別于鱗二首

王世貞

西來天地坼無恙太行城二子狂歌發千山秋思生世人殊黯淡何物與縱橫不獨文章事兼高拙宦名

其二

春花杜陵陌慷慨各沾襟不謂人間地重扶海內心題
詩揮白日把酒笑黃金欲緩征車路關門斗氣沈

挽梁公實

王世貞

當年太阿劍拂拭有光輝出獄果何意延津還一飛星
辰元不沒河嶽自相依吾復憐雷令人今識者稀

答明卿

王世貞

敢倚金紱在蹉跎誤此身時危輸小吏氣盡傍時人自
古文章事尤深放逐臣扁舟五老下隨意破沈淪

長山署中

王世貞

覓句驚從得呼杯幸勿空句堪今日老杯借片時雄項
領紛成態腰支轉未工脩脩故園竹偏在月明中

青州雜感二首

王世貞

尚憶遊燕侶新詩好共論壇成人大將鼎立幾中原放
逐吾曹事漂零聖主恩營丘跨海岱不擬賦招魂

其二

次第人間事無如且挂冠青雲李生失紫氣漢關寒宦

薄差相傍書成已倦看攬衣仍嘆惜愁見萬花殘

吳峻伯將至先以詩來答邀以此

王世貞

忽報嵇康駕頻呼阮籍杯乾坤雙眼到海岱故人來雪
入朱絃盡春留綵筆開欲東雖馬首無乃一徘徊

答寄于鱗三首

王世貞

屈指人間世名成豈偶然中原方軌在畏路拂衣偏病
色高千古窮愁自一天可無沮溺耒難並汶陽田

其二

偶誦招魂語驚心往事多蹉跎吾計失憔悴此生過隱
跡羞叢桂詩章畏蓼我湘江暮煙色愁絕意如何

其三

何限乾坤事歸來汝自酬振衣滄海月搖筆岱雲秋一
字堪金石孤城各斗牛報書知健在不必汨潛流

長興訪徐子與

王世懋

相逢盡一醉惜別戀餘歡布帽憐秋色綈袍入夜寒酒
令人自遠詩任俗相看拙宦吾曹事無歌行路難

祀陵二首

徐中行

風雨從西極河山自北辰
林喧萬馬夕花暗七陵春
慘淡弓刀泣趨陪劍履新
文園即此地誰復漢詞臣

其二

展祀逢寒食登臨起暮愁
陰霾屯虎豹春雨濕松楸
燭影千官靜泉深萬壑幽
行宮雲縹緲應望翠華留

臥病簡于鱗明卿

徐中行

交遊歸欲盡滄海意仍違
豈羨鱸魚膾長懷薜荔衣人

應嗤宦拙我已貴知希起看西山雪悠悠憶翠微

簡子相

徐中行

故國同千里新愁總二毛
豈緣微祿累應為太玄勞
雲月清瑤瑟風塵暗寶刀
知君有起色堪賦廣陵濤

答明卿二首

徐中行

旅館銜杯日詞場問鼎年
昔游曾後乘一別竟先鞭
身豈風塵失盟應海岳懸
當時有長劍依舊倚胡天

其二

燕市驚重見悲歌白日陰乾坤名轉大烽火病逾深萬
事猶存古千秋未折心豈應吾黨外別自有知音

燕山除夕

徐中行

舊遊曾此地除夕況堪悲生死天難問文章老自知中
原纔一遇吾道竟羣疑正有山陽感誰教玉笛吹

秋日二首

徐中行

迢遞懷親舍棲遲念此身百年當自得孤憤竟誰陳白
首存知已黃金閱世人扁舟定早晚湖上一垂綸

其二

風霜物候改歲月客心驚高卧常多病深藏轉畏名滄
洲連夕夢白髮逼秋生歸計仍疎闊偏傷留滯情

哀商中丞

徐中行

將相未交驩烽煙漫築壇至今憂左社何遽失南冠雨
泣蒼梧晚風吹易水寒唯餘龍劍氣長向獄中看

春日同順甫元美遊姚園

徐中行

落魄憐吾黨流光憶去年狂歌依白雪醉眼望青天詞

賦非時好漁樵自舊緣試看芸閣吏何似竹林眠

于鱗元美同日發偕宗吳二生送之分賦

徐中行

萬里知難駐千秋豈更親劍分留紫氣杯盡失青春三
署傾詩客中原散酒人勿令歌變徵風雨易傷神

吳給事謫豫章四首

徐中行

乾坤震蕩後雨雪豫章行與世安徽祿投荒就大名青
山飛瀑色白日走江聲若過柴桑里堪從漉酒生

其二

此日何天問當年已陸沈罪寧懷白壁權合讓黃金縱
改滄桑色難推海岳心湘累靈尚在千載見知音

其三

淮陽漢揖客澤畔楚詞臣霄漢寧容汝江湖且寄身寒
濤千里雪落日九江春試掃匡廬石青天賦隱淪

其四

綠鬢三湘客青楓八月濤未須傷積羽總不廢持螯把
劍星文動攤書嶽色高非君能放逐不復見離騷

過于鱗郡齋

徐中行

高齋淹下榻
雨色暗荒城
濁酒千秋事
綈袍一日情
側身看世態
握手失時名
從此三江上
悠悠好濯纓

出守後寄舊遊

徐中行

白雪吾何有
青雲向未爭
祇銜國士意
遂被黨人名
星斗紛搖落
山川亦震驚
因思河朔飲
一語未堪輕

郭黎梁三生再過客邸

徐中行

白社疎狂客
青門雨雪天
邀歡忘歲晚
得句覺春偏
別

易成今古交難論後先高陽即此地莫問酒壚邊

罷郡後作四首

徐中行

鷹隼翻韞日魚龍脫網時人應嗟放逐我自戴恩私萬
事莊生夢千秋楚客辭倘能齊物理翻怪罷官遲

其二

故人俱蹈海孤客竟歸田碩果久知盡寒灰寧復然掩
關天目雨把釣五湖煙慎惜雙龍劍休教犯斗邊

其三

卧閣身仍病抽簪氣始豪雄飛吾有在殺翮爾徒勞揮
翰千秋失開尊五嶽高此時嵇叔夜真自感山濤

其四

頃已厭承明今歸遂偶耕鴻冥幽客意狙喜衆人情薄
領上何補文章老未成拂衣從此去日月任縱橫

病中東于鱗子與吳國倫

病起科頭夕交深抵掌時即君能載酒而我一論詩意
氣元非偶文章只在茲誰知青侶桂並卧白雲司

柬于鱗子與

吳國倫

世情驚一謬斯道屬羣猜雙壁虞卿至千金郭隗來
眼中猶二子海內足真才欲問藏身地何如濁酒杯

柬子相

吳國倫

文章千古事不向世情看饑飽從囊粟飛垂各羽翰
衆中結襪易身後執鞭難爾若疑山水朱絃何處彈

賦得雙玉贈于鱗元美

吳國倫

何來雙白玉寒色照中天足分荆人別名逾趙士全異

時離合浦終古得藍田愧我持燕石微光四乘前

與黃給事中

吳國倫

落魄無勞歎惟慙負聖明小臣宜得罪古道不成名爾
去招梅福子歸弔屈平舊來鷹隼意敢復向人鳴

秋日匡山二首

吳國倫

倚伏誰能測千秋合自盟大名非我有往事亦人情月
借銜杯色江懸伏枕聲豈應遷客夢容易到神京

其二

閉閣營何事，羣書枕北窓。
星辰占戀闕，風雨助哀江。
應馬心初定，雕龍意未降。
蹉跎問歸計，端愧鹿門龐。

答于鱗元美見慰之作二首

吳國倫

投荒吾自取，二子念何深。
並牘驚人語，三年逐客心。
星河搖起立，風雨暗行吟。
已似長沙弔，慚非汨水沈。

其二

五老忽相失，秋風歸去來。
頗無遷客態，猶使故人哀。
白雪聞詩卷，浮雲度酒杯。
岱宗高不極，東望日徘徊。

歸德作

吳國倫

所經席未暖朝野自孤踪
多病微官好無能長吏容
夢中誰是蝶塵外客猶龍
二子如堪作吾將曳履從

春懷三首

吳國倫

竊祿微無補憂時劇不禁
江山懸帝力宮闕見天心
曲突猶非晚前籌合更深
萬方眉可察那得不沾襟

其二

物意自難合故人殊可憐
望風疑赤幟掩耳問朱絃
血

染吳江水躬耕歷下田庭枝囀黃鳥相憶獨潛然

其三

漸朽淮揚骨難招嶺外魂看詩論伯仲將淚問兒孫
白馬何人至黃泉此意存綿綿總長夜抔土任乾坤

元美夜過將有江南之役

宗臣

金樽墮明月瑤瑟動輕陰砧杵秋城急煙霞故國深
不堪惆悵色兼入別離心去住俱萍梗佳期可易尋

上陵作

宗臣

金鳬常泛海石馬欲鳴風劍珮秋霜響雲煙紫塞通河
山不改色天地自相雄羣帝俱神武園陵白露中

同明卿子與送別于鱗元美

宗臣

春色何堪問開樽是別筵中原送二子北斗散高天深
語江河在雄心日月懸千山分馬首那忍遂揚鞭

天目徐山人

宗臣

天目三千尺西南第一峯瀑來飛萬馬石削起雙龍白
日江華亂青雲海色重行歌秋更好散髮弄芙蓉

元美明卿集張氏園亭

宗臣

古臺荒自出石磴曲相臨忽起千秋思能空萬古心
明月有如此幽人不可禁何須賦搖落夜色五雲深

宋之問詠笛

高低

橫笛夜初鳴長風度曲清誰家明月下無限玉關情
春去梅獨落愁中柳盡生不堪動鄉思鳴咽斷腸聲

高適登閣

高低

向晚登高閣雲天入望遙陰森祇樹合颯沓雨花飄
歸

鴈衝江霧孤帆落暮潮
關河同寓日旅思各蕭條

關山月

高岱

青天一片月萬里獨相依
風急刀環望霜寒玉鏡飛
龍河浮夜色羌笛怨清輝
愁絕閨中婦高城正擣衣

塞上

高岱

孤塞烽煙合龍庭道路開
月明飛羽度雲暗射鵬來
邊草秋先白胡笳夜轉哀
匈奴今未滅莫上望鄉臺

立春夜集李伯承宅

高岱

鳩鵲猶殘雪晴光動上林寒隨宮漏盡春入酒杯深身
世堪長嘯乾坤但苦吟百年能幾醉萍跡任浮沈

再別董元漢

高岱

暫握天南手初嚴薊北程一封排闥入萬里負戈行遠
別憐消渴生還冀聖明白雲樓上月無限憶君情

寄懷李師孟水曹二首

高岱

別署秋光滿千帆霽色開海風吹月上江雨帶潮來名
著山公啓詩傳水部才不知登眺處誰與共銜杯

其二

君為滄水使予卧白雲林古色青萍劍希聲綠綺琴尺
書明月夜千里故人心愁絕兵戈滿孤鴻楚塞深

送元美奉使江南

高岱

海內二三子天涯去住情片帆江月冷孤劍使星明塞
北獨烽燧江南更甲兵感時知有賦還擬寄同聲

贈伯承

高岱

李生負高格瀟灑淨塵襟抗俗榮名薄論交道氣深一

尊聊北海隻字可南金
玄草看充棟無人識此心

春愁

高岱

作客長無了春愁正不禁
苦吟增白髮貫酒盡黃金
笛裏思鄉泪笳邊出塞心
十年驚一夢空自愧朝簪

素屏

高岱

雲母誰家麗孤屏素轉幽
淨搖庭樹影寒颯井梧秋
背月聯瑤席當風障玉樓
美人歌舞罷斜倚不勝愁

吳明卿再謫睢陽

高岱

謫去君何恨，栖遲今古同。
名從遷客重，賦以遠遊工。
駿骨傾燕市，蛾眉出漢宮。
黃金臺下柳，折贈意無窮。

秋夜省中吏隱園獨坐

高岱

窻竹含煙重，庭梧下吹輕。
月高河影澹，天近露華清。
暝入盆魚色，秋疎塞鴈聲。
官曹真似水，吏隱不虛名。

山居

汪時元

煙霞一以卧，歲月幾回新。
不是青山色，寧留白眼人。
行藏惟自識，窮達好誰論。
獨有巖中桂，秋來倍可親。

元日

汪時元

淑氣冰霜後東風草木前紅顏憐舊日白髮見新年
栢葉浮春酒梅花落舞筵興來搖彩筆聊和郢中篇

襄陽留別尊師徐大夫入滇二首

汪時元

飛揚今古意寧免世人疑驛路雙旌發風塵一劍知
雲停冠蓋里月上習家池為問羊公石徘徊馬去遲

其二

飲罷宜城酒陶然日月間使星遙入部真氣又臨關
暮

雪飄三楚春風動百蠻南征天更遠縹緲萬重山

古今詩刪卷二十七